

Inatsisissatut siunnersuummut oqaaseqaatit

Inatsisissatut siunnersuummut oqaaseqaatit nalinginnaasut

1. Aallaqqaasiut

Inissiani attartortittakkani ineqarnermut tapiissutit pillugit Inatsisartut peqqussutaata nr. 3, 31. maj 2001-imeersup akuerineqarneratigut namminersortutut attartortitsisartuni attartortunut ineqarnermut tapiissuteqartarnissaq periarfissinneqarpoq. Inissiani attartortittakkani ineqarnermut tapiissutit pillugit nutaamik inatsisartut inatsisissaannik siunnersuuteqarnermi, taamatullu aamma tapiissuteqarnissamut killiliussat il. il. pillugit nalunaarutip saniatigut inissiap taassumalu aqqissugaanera eqqarsaatigalugit immikkut piumasaqaasiornikkut ineqarnermut tapiissutit aningaasannanniutigineqarsinnaanerisa killilersimaarnissaat siunertaavoq.

Tamatuma saniatigut inunnik isumaginninnermi malittarisassani nutarterisoqarnissaa pillugu Naalakkersuisut takorluugaasa naalakkersuinikkut piviusunngortinnissaattut inatsisissatut siunnersuut isigineqassaaq. Tamanna ilaatigut pissaaq ineqarnermut tapiissutisinnissamut maannakkumut naatsorsueriaatsip allanngortinneratigut maannakkut aningaasarsiarineqartut akileraaruteqaataasussat tunngavigalugit akileraarutitigut ilanngaateqartinnagit naatsorsuisalernikkut. Taamaaliornikkut innuttaasup maannakkut aningaasarsiaanut naapertuunnerusumik ineqarnermut tapiissutit naatsorsortarnissaat qulakkeerneqassaaq.

Tamatuma saniatigut siunnersuutigineqarpoq, ineqarnermut tapiissutit tunniunneqarneranni nakkutilliisoqarnissaa pillugu aqutsisoqarfiup nakkutilliisussaataitanera atuutilersinneqassasoq, taamaalillutik aningaasat tunniunneqartut innuttaasup aningaasanik pisinnaaneranut naapertuunniassammata.

2. Siunnersuummi immikkoortut pingaarnertit

Pisinnaatitaaffimmut atuuttumut tunngatillugu siunnersuutitut saqqummiunneqartumi makku erseqqissarneqassapput:

2.1 Massakkut aningaasarsiat akileraaruteqaataasussat akileraarutitigut ilanngaateqartinnagit Massakkut Inatsisartut peqqussutaanni atuuttummi ineqarnermut tapiissutinut tunniunneqartartut inoqutigiinni ukioq kingullermi akileraarfiusumi qaninnerpaami aningaasarsiarineqartut akileraaruteqaataasussat tamarmiusut tunngavigalugit naatsorsorneqartarput.

Taamaattorli aningaasarsianut akileraaruteqaataasussanut kingullernut ilisimaneqartunut assersuullugu qinnuteqarnerup nalaani inoqutigiit aningaasaqarnikkut atugarisai annertuumik allanngorsimasinnaapput.

Qinneqarnerup nalaani naatsorsuinissamut tunngavigineqartup massakut akileraarutitigut ilanngaatitaqanngitsumik massakut aningaasarsianut allanngortinneratigut ineqarnermut tapiissutinik tunniussisoqarnerani inoqutigiit massakkorpiaq isertitatigut atugarisaannut naapertuuttoqarnerusaaq. Massakut aningaasarsiarineqartut akileraarutitigut ilanngaateqartinneqanngitsut tunngavigalugit ineqarnermut tapiissutinik tunniunneqartunik naatsorsuisarnej inoqutigiit ukiumi akileraarfiusussami kingullermi qaninnerpaami aningaasarsiaat aallaavigalugit naatsorsuisarnermiit naapertuunnerulernissaa naatsorsuutigineqarpoq.

Aningaasarsiat massakut aningaasarsiatut akileraaruteqaataasussatut akileraarutitigut ilanngaateqartinnaqit naatsorsorneqassapput.

Maannakkut tunngaviutinneqartumut atuuttumut sanilliullugu, tassani aningaasarsiat akileraaruteqaataasussat (inaarutaasumik akileraarusiisarneq) ukiumi akileraaruteqarfiusumi kingullermi aningaasarsiarineqartut aallaaviutinneqartarnerinut periusissap nutaap allaanerussutigaa qinnuteqarnerup nalaani ilanngaaseereernani aningaasarsiat akileraaruteqaataasussat eqqortut aallaavigineqartussanngornerat, tamatumanilu aningaasarsiat akileraarutitigut ilanngaatigisassanit appartinneqartussaanaatik, taakkunungalua ilaallutik amigartoorutaasinnaasut, taamaaliornikkullu qinnuteqartut tamarmik assigiinnerusumik sullinneqarsinnaalerlutik.

Aningaasarsiat akileraaruteqaataasussat tunngavigalugit naatsorsuisarnerup (ukioq inaarutaasumik akileraarfiusoq kingulleq) maannakkut aningaasarsiat (maannakkut ukioq akileraarfiusoq) tunngavigalugit naatsorsuisarnermi tunngavigineqartup inatsimmi allanngortinneratigut inoqutigiit qinnuteqarnerup nalaani aningaasarsiai naatsorsuinermi tunngaviutinneqartalerpata naatsorsuisarnerup naapertuunnerusunngornissaa naatsorsuutigineqarpoq.

2.2 Inissiamut taassumalu aaqqissugaaneranut tunngavigineqartussat

Maannamut inatsit atuutsinneqarsimasoq malillugu ineqarnermut tapiissutit aningaasartassaat inissiami meeqqat amerlassusaat isertitallu akileraaruteqaataasussat tamarmiusut katinneri tunngavigalugit aalajangersarneqartarput.

Ineqarnermut tapiissutinik tunniussinissamut tunngavigineqartut inatsisissatut siunnersuut aqqutigalugu oqaasertaliussamik ”inissiaq taassumalu aaqqissugaanera” ilaneqarput. Tamatumalu kingorna tunngavigineqartoq Inatsisartut inatsisaanni piunasaqaatit aalajangersarneqartut allat assigalugit ilanngunneqarluni. Tunngavigineqartussap nutaap atorneratigut "inissiaq taassumalu aaqqissugaanera" nalunaarutikkut inissianut aalajangersimasunut ineqarnermut tapiissutinut aningaasanik qanoq annertutigisunik tapiissuteqartoqarnissaanut aningaasanut erseqqinnerusumik aalajangersaasoqarnissaa periarfissinneqassaaq.

Oqaasertaliussap inissiaq taassumalu aaqqissugaanera ilanngunneqarpoq attartortut ataasiakkaat apeqqutaatillugit ineqarnermut tapiissutit nikingassutaasa nalimmassarneqartarnissaat tunngavissikkumallugu. Ineqarnermut tapiissutinut maleruagassani iluanaarniarqarsinnaanerata killilersimaarnissaa pillugu naalakkersuinikkut kissaateqartoqarnera tunngavigalugu aalajangersagaq atorneqalerpoq, tassami peqqussut manna atuuttoq malillugu tamatumunnga periarfissaqanngimmat.

Nalunaarutip atorneqarfissaa pillugu erseqqissaat sukumiinerusooq imarisaalu § 5, imm. 1-imut aamma § 8, imm. 2-mut oqaaseqaatini allaqqapput.

2.3 Nakkutiginnittussaataaneq

Inatsisissatut siunnersuut aqputigalugu ineqarnermut tapiissutinut akuersissuteqarnermut tunniussinermullu kommunip nakkutiginninnissaanut inatsisitigut aalajangerneqartumik nakkutiginnittussaataanermik atuutilersitsisoqassaaq. Aalajangersakkami oqaasertaliunneqartut malillugit ineqarnermut tapiissutit tunniunneqartut eqqortuunersut aamma innuttaasup aningaasarsiarisaanut naapertuunnersut ingerlaavartumik misissortarnissaannut kommuni pisussaaffilerneqarpoq.

2.4 Inatsimmut nassuiaatini nalinginnaasumik allannguutit

Tamakku saniatigut inatsisissatut siunnersuutip ilusaanik allanngortitsisoqarpoq, soorluttaarlu aalajangersakkanut ataasiakkaanut nassuiaatit inatsimmut atuuttumut sanilliullugit itisilerneqartut.

3. Pisortanut aningaasatigut allaffissornikkullu kingunerisassai

3.1. Pisortanut aningaasaqarnikkut kingunerisassai

Maannakkut aningaasarsiarineqartut tunngaviutittalernerisigut piffissami ungasinnerusumi ineqarnermut tapiissutinik tunniussisoqarnerani pisortat sipaaruteqarnerulernissaat naatsorsuutigineqarpoq. Pisortat ineqarnermut tapiissutinut aningaasartuutaasa qanoq annertutigisumik sipaarutaasinnaanernik naatsorsuineq ineqarnermut tapiissutit tunniunneqartut amerlassusaannut missingiineq aqputigalugu pingaarnertigut isiginiarneqassaaq, taamaalisoqarneranimi ineqarnermut tapiissutinut aningaasarsiaanut naatsorsuinerit misissorneqarsimanngitsut aallaavigineqartarmata.

Inissiaq taassumalu aaqqissugaaneranut tunngavigineqartup atoneratigut ineqarnermut tapiissutit annertussusiisa il.il. sanilliunnerisigut § 8, imm. 2 naapertorlugu nalunaarummi suliarineqartussami malittarisassanik sukumiinerusunik Naalakkersuisut aalajangersaanissaminnut tunngavissaqalissapput.

Aningaasaqarnikkut kingunerisassai akileraarutinut aningaasarsianullu paasissutissat kiisalu ineqarnermut tapiissutinut paasissutissat 2013-imeersut aallaavigalugit naatsorsorneqarput.

Ilanngaaseereernani aningaasarsiat aallaavigalugit naatsorsuisoqarpoq, taakkunanngalu 10.000 kr.-nit ilanngaatineqarlutik.

Pisortanut aningaasaqarnikkut kingunerisassaasa naatsorsorneranni ukiumut 12,8 mio. kr.-inik sipaartoqartarnissaa naatsorsorneqarpoq. Tamakkiisumik sipaartoqarsinnaanera anguneqassaaq nalunaarut ilaasussaq atuutsinneqalerpat.

3.2. Pisortanut allaffissornikkut kingunerisassai

Inatsisissatut siunnersuutip pisortat allaffissorneranni oqimaatsorsioertitsilernissaa ilimagineqarpoq, tassami inatsisissatut siunnersuut aqquutigalugu ineqarnermut tapiissutinik innuttaasumut tunniussisoqarnerani aningaasat tunniunneqartut naapertuuttuunersut kommuninit misissorneqartalertussaammata.

4. Inuussutissarsiortunut aningaasatigut allaffissornikkullu kingunerisassai

Ineqarnermut tapiissutit annerpaaffissaata nalunaaruteqarnermi annertussusilerneqarsinnaaneranik inatsisissatut siunnersuut periarfissiivoq. Inissiap aqqissugaanera apeqqutaalluni aningaasat annerpaaffissaat aalajangerneqartassaaq. Inissiaq taassumalu aqqissugaaneranut tunngavigineqartup atorneratigut attartortitsisut attartornermut akimik appaanissaannut imaluunniit attartugassap aqqissugaaneranik pitsanngorsaaniissamut, attartugassat inoqanngitsut pinngitsoortinniarlugit, kajumilersinneqassasut naatsorsuutigineqarpoq.

Inatsisissatut siunnersuutip inuussutissarsiortnermut allaffissornikkut annertuumik kinguneqarnissaa naatsorsuutigineqanngilaq. Attartortitsisut ataasiakkaat inatsimmi taassumalu nalunaarutitaani ineqarnermut tapiissutinik pisarnissamut piumasaqaatit aalajangiunneqartut eqqumaffigissavaat.

5. Avatangiisinut, pinngortitamut innuttaasullu peqqissusaannut kingunissai

Siunnersuut avatangiisinut, pinngortitamut innuttaasullu peqqissusaannut kinguneqartussatut ilimagineqanngilaq.

6. Innuttaasunut kingunissai

6.1 Massakut aningaasarsiarisat

Maannakkut aningaasariarineqartut naatsorsuinermit tunngaviutinneqartarnissaasa atuutilersinneratigut ineqarnermut tapiissutit aningaasartaasa annertussusissaat innuttaasup maannakkut aningaasaqarnikkut atugarisaanut naapertuunnerulissapput. Taamaaliornikkut aningaasat tunniunneqartut, aningaasallu innuttaasup ilumoortumik pisinnaasaata akornanni naapertuuttoqarnerulernissaa qulakkeerneqassaaq.

6.2 Inissiamut taassumalu aqqissugaaneranut tunngavigineqartussat.

Inissiaq taassumalu aaqqissugaaneranut tunngavigineqartup atorneratigut ineqarnermut tapiissutit annertussusaasa il.il. sanilliunnerisigut § 8, imm. 2 naapertorlugu nalunaarummi sularineqartussami malittarisassanik sukumiinerusunik Naalakkersuisut aalajangersaanissaminnut tunngavissaqalissapput.

Inissiaq taassumalu aaqqissugaaneranut tunngavigineqartup atorneratigut attartortitsisut attartornermut akimik appaanissaannut imaluunniit attartugassap aaqqissugaanerani pitsannorsaanissamut kajumilersinneqassasut naatsorsuutigineqarpoq. Tamanna attartortut ilaannut inissiat pitsaanerulernerannik attartornermullu akit annikinnerulernerannik kinguneqassaaq. Inissiaq taaassumalu aaqqissugaanera pequtaalluni ineqarnermut tapiissut annikillineqassappat, attartortitsisullu attartukkap pitsaassusaa allannngortinngippagu imaluunniit attartornermut akia annikillinngippagu, taava attartortitsisup attartortup isertitaanut naleqquttumik attartornermut akigitinneqartoq ugartortariaqassanerani kinguneqarsinnaavoq.

7. Kingunerisassai pingaaruteqartut allat

Siunnersuut pingaarutilinnik allanik kinguneqassasooq naatsorsuutigineqanngilaq

8. Oqartussaasunik, peqatigiiffinnik il.il. tusarniaaneq.

Siunnersuut maajip 15-ani 2015-imiit juunip 19-ata tungaanut 2015-imi ukununga tusarniaassutiginerpoq:

Naalakkersuisut Siulittaasuata Naalakkersuisoqarfia, Peqqissutsimut Naalakkersuisoqarfik, Aningaasaqarnermut Naalakkersuisoqarfik, Aatsitassaqaarnermut Naalakkersuisoqarfik, Inuussutissarsiornermut, Suliffeqaarnermut Niuernermullu Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik, Ilinniartitaanermut, Kultureqaarnermut, Ilisimatusarnermut Ilageeqarnermullu Naalakkersuisoqarfik, Pinngortitamut, Avatangiisinut Inatsisinillu Ataatsitsinermut Naalakkersuisoqarfik, Ineqarnermut, Sanaartornermut Attaveqaarnermullu Naalakkersuisoqarfik.

KANUKOKA, Isumaginninnermut Naammagittaalliuuteqartarfik, Kommunernes Revision, Kattuffik Utoqqaat Nipaat, Inuit Pisinnaatitaaffiinit Kalaalit Nunaanni Siunnersuisoqatigiit, Dansk Institut for Menneskerettigheder, Inooqat, MIO, IMAK, AK, NUSUKA, SIK, PIP, Grønlands Erhverv, ASG, PPK, KNAPK, Agerskov Consulting, GrønlandsBanken, BankNordik, Grønlands Revisionskontor A/S, EY Grønland, Illuut, INI, Iserit, Qaasuitsup Kommunia, Qeqqata kommunia, Kommuneqarfik Sermersooq, Kommune Kujalleq.

Ukunanga tusarniaanermut akissuteqartoqarpoq:

Institut for Menneskerettigheder, BDO, Isumaginninnermi Naammagittaalliuuteqartarfik, Inooqat, SIK, KANUKOKA, MIO, IMAK, PPK. Ineqarnermut, Sanaartornermut Attaveqaarnermullu Naalakkersuisoqarfik, Qeqqata Kommunia, Qaasuitsup Kommunia,

Uku oqaaseqaateqanngillat:
Institut for Menneskerettigheder, IMAK.

Tusarniaanermut akissutini Ilaqutariinnermut, Naligiissitaanermut Isumaginninnermullu Tunngasunut Naalakkersuisoqarfimmut tunniunneqartuni pingaarnertut taaneqartut tullerriaarlugit ataani takutinneqarput. Matumani tusarniaanermut akissutigineqartut iluarsillugit atoqqinneqarneri pineqarput, taakkunanilu naalakkersuisoqarfiup tusarniaanermi akissutininut oqaaseqaatai naqinnernik orlingasunik allanneqarlutik.

Inooqat

Inooqat erseqqissaavoq innarluutillit inissiani illersukkani imaluunniit allatigut immikkut inissiani najugaqartut, kommuninullu ineqarnermut akiliutinik akiliisartut ineqarnermut tapiissutinik tunineqarsinnaanngimmata. Inooqat kissaateqarpoq inuit taakkua ineqarnermut tapiissutinik tunineqarsinnaasariaqartut.

Inatsisissatut siunnersuut aqqutigalugu ineqarnermut tapiissutinik tunineqarsinnaasut amerlineqarnissaat eqqarsaatigineqarsimannilaq. § 1 malillugu ineqarnermut tapiissutinik inissianut Inissianik attartortittakkat pillugit Inatsisartut peqqussutaannut ilaasunut tunniussisoqarsinnaavoq.

Isumaginninnermi Naammagittaalliuuteqartarfik

Isumaginninnermi Naammagittaalliuuteqartarfiup tusarniaanermut akissuteqarnermini erseqqissarlugu oqaatigaa qanoq ililluni inatsisissatut siunnersuut siunertaq malillugu ingerlanneqarsinnaassanersoq.

Oqaaseqaatit taakku suliap ingerlateqqinnissaanut ilanngullugit eqqarsaatigineqarumaarput.

Isumaginninnermi Naammagittaalliuuteqartarfiup siunnersuutigaa § 12 imaalillugu allanngortinneqassasoq, tassalu qinnuteqaatip akuerineqarfia qanoq ilineratigut ineqarnermut tapiissutinik tunineqarnissamut aalajangiisuusariaqanngitsoq.

Oqaatigineqartoq tusaatissatut tiguneqarpoq, inatsimmilu oqaasertaliunneqartut allanngortinneqarlutik, taamaalilluni qinnuteqaat tunniunneqareerpat piumasaqaatillu naammassineqarsimappata, innuttaasoq ineqarnermut tapiissutinik pisinnaatitaallissalluni.

BDO

BDO-mit siunnersuutigineqarpoq oqaasertaliussaq "maannakkut aningaasarsiat" imatut oqaasertalerneqassasoq "maannakkut aningaasarsiat akileraarutitigut ilanngaateqartinneqanngitsut".

Oqaatigineqartoq tusaatissatut tiguneqarpoq, tassungalu naapertuuttumik oqaasertai allanngortinneqarlutik.

BDO-mit siunnersuutigineqarpoq § 7 malillugu kommunit misissuisussaaitaanerat atuaruminartumik ilitsersuusiornikkut sukumiinerusumik nassuiarneqassasoq.

Oqaatigineqartoq tusaatissatut tiguneqarpoq, ilitsersuullu naalakkersuisoqarfimmiit suliarineqartoq aqputigalugu sukumiinerusumik nassuiarneqarumaarluni.

SIK

SIK-mit siunnersuutigineqarpoq inatsisissatut siunnersuummi atuisunut akiliuteqartitsisarneq ilanngunneqassasoq, tassami inissiani tamaniunngitsoq atuinermut uuttuutunik immikkut ikkussuisoqarnikummat. SIK-mit erseqqissarneqarpoq najugaqartut inissiani inoqanngitsuni kiassarnermut akiliuteqartarmata. Tamannalu pissutigalugu SIK-mit kissaatigineqarpoq atuinermut 50 %-ia ineqarnermut tapiissutinut ilannguttariaqartoq. SIK-mit ilanngullugu erseqqissarneqarpoq attartortut ilaatigooriarlutik atuinermut naapertuuttumik ineqarnermut akiliuteqartartut.

Oqaaseqaatigineqartoq tusaatissatut tiguneqanngilaq. Inatsisissatut siunnersuummi § 4, imm. 1-imi takuneqarsinnaavoq ineqarnermut tapiissutit ineqarnermut akiliummut tunniunneqartartut. § 4 imm. 2-mi takuneqarsinnaavoq ineqarnermut tapiissutit atuinermut aningaasartuutitut aamma atuisut aningaasartuuteqarnerannut tunniunneqarneq ajortut. Inatsisissatut siunnersuut aqputigalugu maleruagassanik atuuttunik allanngortitsinissaq eqqarsaataannngilaq.

KANUKOKA-mit

erseqqissarneqarpoq inatsisissatut siunnersuut kommuninut allaffissornikkut aningaasaqarnikkullu kinguneqarumaartoq, KANUKOKA-miillu inassutigineqarpoq tamanna oqaaseqaatini erseqqinnerusumik taaneqassasoq.

Inatsisinut oqaaseqaatit naleqqussarneqarput taamaalilluni maannakkut inatsisinut oqaaseqaatini takuneqarsinnaalerluni kommunit allaffissornikkut suliaqarnerulersussaasut, tassami kommunit inatsisissatut siunnersuut aqputigalugu ineqarnermut tapiissutinut tunniunneqartunut nakkutiginnittuulersussaammata, taamaaliornikkut aningaasat tunniunneqartut innuttaasup pisasaanut naapertuunnerunissaat qulakkeerniarlugu. Isumaginninnikkut ikiorsiissutit innuttaasunut pisinnaatitaanngitsunut tunniunneqartussaannnginnerannut kommuni ullumikkut qulakkeerinninnissamik pisussaaffeqareerpoq. Tamanna erseqqissarniarlugu inatsisip oqaasertaani toqqaannartumik takuneqarsinnaaapput.

MIO

MIO-mit meeraq angajoqqaamini marluusuni najugaqartillugu aamma angajoqqaat avissimatillugit ineqarnermut tapiissutinik tunniussisoqartarnera apeqquutigineqarpoq.

Meeqqat arnaminni angumminnilu paarlakaallugit najugaqartut inuit allattorsimaffianni nalunaarsorneqartut CPR pillugu inatsit malippaat. Tamanna ineqarnermut tapiissutit pillugit naalackersuisoqarfiup ilitsersuutaani erseqqinnerusumik nassuiarneqassaaq.

MIO-mit siunnersuutigineqarpoq inatsisissatut siunnersuummut oqaaseqaatit nalinginnaasut allanngortinneqassasut, taamaaliornikkut siunissami nalinginnaasumik oqaaseqaatini "Meeqqanut inuusuttunullu kingunerisassai" pillugit immikkoortumik takussutissaqartarniassammat.

Inatsisissatut siunnersuutip ilusilersornerani Namminersorlutik Oqartussani inatsisilerinermi teknikikkut maleruagassat malinneqarput, taakkunanilu inatsisissatut siunnersuutip ilusilernissaanut piumasarineqartut aalajangersimasut aalajangersarneqarlutik.

PPK

Oqaasertaliussaq "aalajangersimasumik angerlarsimaffik" PPK-mit apeqquutigineqarpoq.

Aalajangersimasumik angerlarsimaffittut paasineqassaaq sumiiffik (inissiaq) aalajangersimasumik siniffigineqartartoq feeriarneq, suliffimmuut atatillugu angalaneq, napparsimaneq assigisaalluunniit pissutigalugit tassaniinnigikkaanni siniffigineqartartoq aammalu pigisanik inissiivigineqartartoq.

Maannakkut aningaasarsiat, taakkulu qanoq naatsorsorneqartarnerisut PPK-p apeqquutigai.

Maannakkut aningaasarsiat akileraarutitigut ilanngaateqartinnagit maannakkut aningaasarsiatut akileraaruteqaataasussatut tamarmiusutut naatsorsorneqassapput. Maannakkut aningaasarsiat qinnuteqarnerup nalaani ilanngaaseereernani aningaasarsianik akileraaruteqaataasussanik aallaaveqarput, aningaasarsiallu akileraarutitigut ilanngaatit aqqutigalugit appartinneqartussaananatik. Maannakkut aningaasarsiat ukiumi massakkut akileraarfiusumi aallaaveqartinneqarput.

"inissiap taassumalu aaqjissugaanera" erseqqissarnissaa PPK-p ujartorpaa.

Oqaaseqaatit tusaatissatut tiguneqarput, inatsimmilu oqaasertaliunneqartut tamatumunnga naapertuuttunngorlugit naleqqussarneqarlutik. Inatsisissatut siunnersuut nalunaarummi

inatsit naapertorlugu atuutilersussami ineqarnermut tapiissutit inissiaq taassumalu aaqqissugaanera tunngavigalugu naatsorsisarnissamut tunngavissiissaaq.

PPK-mit attartortoq paasissutissanik eqqunngitsunik tunniussisimatillugu utertitsisussaataaneq pillugu ajornartorsiutaalersinnaasut pillugit apeqquteqarpoq.

§ 11, imm. 3-mi pineqarpoq ineqarnermut tapiissutit attartortumut toqqaannartumik tunniunneqartarnissaat. § 13, imm. 1-imi tunineqartup paasissutissiinissaminik pisussaaffini unioqutissimappagu utertitsisoqartarnissaa erseqqissarneqarpoq.

Ineqarnermut, Sanaartornermut Attaveqarnermullu Naalackersuisoqarfik

Inatsisissatut siunnersuummi § 10-mi oqaasertaliunneqartunut tunngatillugu Ineqarnermut, Sanaartornermut Attaveqarnermullu Naalackersuisoqarfimmiit siunnersuutigineqarpoq arlaatigulluunniit nalornisoqannginnissaa pillugu § 10-mi § 5-imut innersuussisoqassasooq.

Oqaaseqaatigineqartoq tusaatissatut tiguneqanngilaq, tassami § 10 malillugu uppernarsaasoqarnissaanik pisariaqartitsineq § 5 malillugu annertunerusinnaammat.

Qeqqata Kommunია

Qeqqata Kommuniata erseqqissarpaa nakkutiginnittussaataaneq aamma § 5, imm. 1 innuttaasunik sullissinermi suliaqutaasalernerannik tamanna kinguneqartussaassasooq.

Isumaginninnikkut ikiorsiissutit innuttaasunut pisinnaatitaanngitsunut tunniunneqartussaanninnerannut kommuni ullumikkut qulakkeerinninnissaminut pisussaaffeqareerpoq. Tamanna erseqqissaatiginiarlugu inatsisip oqaasertaatigut toqqaannartumik taakkua takuneqarsinnaapput.

Qeqqata Kommunianit apeqqutigineqarpoq § 5, imm. 3-mut tunngatillugu innuttaasup Innuttaasunut Sullissivimmut nammineerluni saaffiginninnissaa kommunip utaqqisassaneraa.

Oqaatigineqartoq tusaatissatut tiguneqarpoq, inatsimmullu oqaaseqaatit allanngortinneqarlutik, taamaalillunilu kommuni nammineerluni CPR-inut Nalunaarsuiffimmiit imaluunniit nalunaarsuiffinniit allaniit paasissutissanik piniarsinnaanngortillugu.

Qeqqata Kommuniata tamatuma saniatigut suliffissaaleqisut qanoq pineqartassanersut apeqqutigaa. Apeqqutigineqartoq tusaatissatut tiguneqarpoq, taamaaliornikkut ineqarnermut tapiissutit pillugit ilitsersuummi naalackersuisoqarfiup suliaani periuserineqartoq erseqqinnerusumik nassuiarneqarlunilu itisilerneqassalluni.

Qaasuitsup Kommunia

Inatsisissatut siunnersuutip piviusunngortinnissaanut ataatsimut oqaaseqaatit:
Qaasuitsup Kommunia tusarniaanermut akissummini qanoq iliorluni inatsisissatut siunnersuutip ulluinnarni atorneqarsinnaaneranut isummersuutiniq arlalinnik erseqqissaateqarpoq. Isummersuutit tamakku naalakkersuisoqarfiup isummersuutigisimasaanut naapertuupput, Qaasuitsullu Kommuniata oqaaseqaatai inatsisissatut siunnersuutip piviusunngortinniarni ingerlaqqinnissamut ilanngunneqarumaarput.

Oqaaseqaatit ersarissut:

Qaasuitsup Kommunia "inissiaq taassumalu aqqissugaanera" pillugu erseqqissaasoqarnissaanik ujartuivoq.

Oqaaseqaatit tusaatissatut tiguneqarput, inatsimmilu oqaasertaliunneqartut tamatumunnga naapertuuttunngorlugit naleqqussarneqarlutik. Inatsisissatut siunnersuut nalunaarummi inatsit naapertorlugi atuutilersussami ineqarnermut tapiissutit inissiaq taassumalu aqqissugaanera tunngavigalugu naatsorsornissaannut tunngavissiissaaq.

Qaasuitsup Kommunianit oqaatigineqarpoq kommunit nakkutilliisussaatitaanerat immikkut erseqqissaatigineqartariaqartoq.

Oqaaseqaatit tusaatissatut tiguneqarput, nakkutilliisussaatitaanerullu annertussusaa ilitersuummi naalakkersuisoqarfimmiit suliarineqartumi erseqqinnerusumik nassuiarneqarumaarluni.

Qaasuitsup Kommunianit erseqqissarneqarpoq § 13, imm. 1-imi oqaaseq "qinnuteqartoq" atorunnaartariaqartoq, tassami qinnuteqartoq ineqarnermut tapiissutiniq tunineqarsimangimmat.

Oqaaseqaatit tusaatissatut tiguneqarput, inatsimmilu oqaasertaliunneqartut tamatumunnga naapertuuttunngorlugit naleqqiivigineqarlutik.

Qaasuitsup Kommunianit erseqqissarneqarpoq § 13, imm. 2-mi uppersaasussaatitaaneq ingasappallaartoq atorunnaartariaqartorlu.

Oqaaseqaatit tusaatissatut tiguneqarput, inatsimmilu oqaasertaliunneqartut tamatumunnga naapertuuttunngorlugit naleqqussarlutik.

Qaasuitsup Kommunia § 14, imm. 1 pillugu erseqqissaavoq atorunnaarsitsinissamut kommunalbestyrelsiq aalajangiinissaanut piimasaqaat ineqarnermut tapiissutit

atorunnaarsinneqarneranut sullivanik ingerlatsinermut atatillugu sukkasuumik sulisinnaanermut tamanna killiliisoq. Tamanna tunngavigalugu oqaasertaliunneqartoq taanna aalajangersakkaniit peertariaqarpoq.

Oqaaseqaatit tusaatissatut tiguneqarput, inatsimmilu oqaasertaliunneqartut tamatumunnga naapertuuttunngorlugit naleqqussarlugit.

Aalajangersakkanut ataasiakkaanut oqaaseqaatit

§ 1-imut

Peqqussut Inatsisartut inatsisaannik taarserneqarsimammat aalajangersagaq oqaasertaatigit allanngortillugu ingerlateqqinneqarpoq. Siunertaanngilaq piviusunik allannguinnissaq.

Aalajangersakkami aalajangersarneqarpoq ineqarnermut tapiissutit inissianut attartortittakkanut tunniunneqartassasut attartornermut inatsisiliornerit qaqugukkulluunniit atuuttut malillugit.

§ 2-mut

Matumani maleruaqqusat maannamut atuuttut allanngortinnerat pineqarpoq.

Inissiamik oqarnermi sumiiffik attartornermut isumaqatigiissut malillugu attartortup ineqarfigisinnaasaa pineqarpoq.

Attartornermut isumaqatigiissummi inissiami anginerusumi inissiami mikinerusumi ineqarsinnaatitaaneq pineqarpat, soorlu attartornermut isumaqatigiissummi illumi anginerusumi ineeraq pineqarsimappat, attartornermut isumaqatigiissummi "inissiaq" tassaassaaq ineeraq attartortup attartornermut isumaqatigiissut aqutigalugu ineqarfigisinnaasaatut pissarsiarisimasaa. Tamatumunnga pissutaavoq illu angisooq ineerartaqarsinnaammat attartortinneqarsinnaasunik.

Inoqutigiinnik oqarnermi attartornermut isumaqatigiissut aqutigalugu attartortup ineqarfigisinnaasaani inuit tamarmik inissiami najugaqartut pineqarput. Aalajangersakkami erseqqissarneqarpoq inersimasut meeqqallu tamarmik inissiami inoqutigiinnut ilaallutik najugaqartut.

Aalajangersimasumik angerlarsimaffittut paasineqassaaq sumiiffik (inissiaq) aalajangersimasumik siniffigineqakkajuttoq, suliffimmut atatillugu angalaneq, napparsimaneq assigisaalluunniit pissutigalugit tassaniinngikkaanni siniffigineqartartoq aammalu pigisanik inissiivigineqartartoq.

Aalajangersakkap aamma kingunerissavaa meeqqat 18-it sinnerlugit ukiullit, aappaqarsimappatalu taakku ilanngullugit, angerlarsimaffimmi najugaqartut kiisalu meeqqat 18-it inorlugit ukiullit allallu inoqutigiinnut ilanngullugit naatsorsuunneqartarnissaat.

§ 3-mut

Maleruaqqusat ulloq manna tikillugu atuuttut ingerlateqqinnerat matumani pineqarpoq, taakkunanilu aalajangersakkamut nassuiaatit erseqqissaavigineqarlutik.

Imm. 1-imut

Aalajangersakkami oqaatigineqarpoq, ineqarnermut tapiissuteqartoqarsinnaanngitsoq init najugarineqartut amerlassusaasa najugaqartut amerlassusaat inimik ataatsimik sinnersimappatigit. Inissiaq najugaqartut amerlassusiinut sanilliullugu ineeqqamik ataatsimik sinneqarsimappat, ineeqqanik amerlaqataannik ikinnerusunilluunniit initaqarpat ineqarnermut tapiissuteqartoqarsinnaavoq.

Imm. 2-mut

Init najugarineqartut amerlassusiisa najugaqartut amerlassusaat inimik ataatsimik sinnersimappatigit ineqarnermut tapiissuteqartoqarsinnaanngitsoq pillugu pingaarnertut maleruaqqusamut aalajangersagaq ilaatinneqanngilaq. Immikkut ittumik pisoqartillugu kommunalbestyrelsip imm. 1-imik avaqqutsisinnaaneranik aalajangersagaq periarfissiivoq.

Immikkut ittumik pisoqarnerit innuttaasup massakkut atugarisaanut sanilliunneqartassapput. Immikkut ittumik pisoqarneranik assersuutitut oqaatigineqarsinnaavoq tassangaannartumik inoqutigii katitigaanerisa allannguuteqarnerat. Taakkununnga assersuutaasinnaapput ilaqutariinni avittoqarsimappat toqukkulluunniit qimaguttoqarsimappat, taamaalineranilu piffissap ilaani qimagaasumut iluamik inissilluarnissamut pisariaqartitsisoqartillugu. Immikkut ittumik pisunut ilaasinnaavoq meeraq angerlarsimaffiup avataanut inissinneqarsimappat, taamaalineranilu angerlartitsisoqassappat meeqqat ineeraasa tigummiinnarnissaat tulluartutut nalilerneqarpat. Taamatut pisoqartillugu pisariaqartitsisoqassagaluarpat inuttut silatusaartumillu iliuuseqarnissaq aalajangersakkatigit inissaqartinneqarpoq.

§ 4-mut

Matumani maannamut maleruaqqusat atuuttut ingerlateqqinneqarnissaat pineqarpoq.

Imm. 1-imut

Aalajangersakkami oqaatigineqarpoq ineqarnermut tapiissutit taamaallaat ineqarnermut akiliummut atorneqarsinnaasut.

Imm. 2-mut

Tassa atuinermut atuinermilu akiliutinut ineqarnermut tapiissutinik tunniussisoqarsinnaanngilaq. Atuinermut aningaasartuutini maannakkorpiaq pineqarput innaallagiaq, imeq kiassarnerlu, kingusinnerusukkulli aningaasartuutit allat ilaatinneqalersinnaapput, tassa taama ittunut akiliteqartarnissaq eqqunniarneqarpat. Inissiani nammineq pigineqartuni ineqarnermut akiliutit atuinermilu aningaasartuutit akornanni immikkoortitsisoqarsinnaavoq.

Imm. 3-mut

Inissiani attartortittakkani ineqarnermut akiliutit inissianik attartornermut inatsisiliorneq qaqugukkulluunneq atuuttoq malillugu nassuiarneqarnissaat aalajangersakkatigut erseqqissarneqarpoq.

§ 5-imut

Matumani maleruaqqusat maannamut atuuttut allanngortinnerat pineqarpoq.

Imm. 1-imut

Ineqarnermut tapiissutit suna tunngavigalugu naatsorsorneqartarnersut aalajangersakkatigut erseqqissarneqarpoq. Ineqarnermut akiliutit, inoqutigiit akileraarutitigut ilanngaait ilanngunnagit massakut aningaasarsiarisaat akileraaruteqaataasussat tamarmiusut, inissiaq taassumalu aqqissugaanera kiisalu meeqqat 18-it inorlugit ukiullit angerlarsimaffimmi najugaqartut naatsorsuinermi tunngavigineqarput.

Akileraarutitigut ilanngaait ilanngunnagit massakut aningaasarsiani akileraaruteqaataasussani tamarmiusuni aallaavigineqarput qinnuteqarnerup nalaani ilanngaaitissat sioqqullugit maannakkorpiaq aningaasarsiarineqartut akileraaruteqaataasussat, matumanilu aningaasarsiat akileraarutitigut ilanngaatinik appartinneqarnatik, taakkununga ilanngullugit namminerisamik aningaasatigut amigartoorutit. Massakut aningaasarsiat akileraaruteqaataasussat tamarmiusut naatsorsorneranni aningaasarsiat A-t aamma aningaasarsiat B-t ilanngunneqarput, matumani akileraarutitigut ilanngaait ilanngaatiginngikkaluarlugit. Inoqutigiit massakut aningaasarsiaat akileraaruteqaataasussat qinnuteqarnerup nalaani naatsorsorneqassapput, tassanilu aningaasarsiat inoqutigiit ukiumi tassani qaammatisiuteqarfiusumi aningaasarsiarisimasai kiisalu inoqutigiit ukiup qaammatisiuteqarfiusup sinnerani isertitassatut ilimagisai pineqarput.

Oqariaaseq inissiaq taassumalu aqqissugaanera aqqutigalugu ineqarnermut tapiissutit aningaasartaanni ineqarnermut tapiissutinik pisussap ilaquuttatigut aningaasatigullu atugarisaata saniatigut ineqarnermut tapiissutinik pisussap attartugaa, attartukkallu aqqissugaanera ilanngunneqartussaapput. Tunngavigineqartussami nutaami inissiaq taassumalu aqqissugaanera aqqutigalugu inissianut aalajangersimasunut ineqarnermut tapiissutinut aningaasanik qanoq annertutigisunik tunniussisoqarnissaanut aningaasanut erseqqinnerusumik aalajangersaasoqarnissaa periarfissinneqassaaq. Aningaasartaanni ilaatigut apeqqutaatinneqassapput attartortinneqartup eqqiluisaarnissakut atortutigut qanoq inissisimanera, attortortinneqartumi erngup aqqutaanik il.il. ikkussisoqarsimanersoq, taakkuninngalu imaaliallaannaq pissarsisoqarsinnaanersoq. Piumasaqaatit ineqarnermut tapiissutit annerpaaffiannik pissarsinissamut naammassineqartussat nalunaarummi inatsimmi § 8, imm. 2 malillugu atortuulersussami takuneqarsinnaassapput. Ineqarnermut tapiissutit aningaasartassaasa annertussusissaanni apeqqutaassaaq attartortitami piumasarineqartut

nalunaarummi aalajangersarneqartut naammassineqarsimanersut. Ineqarnermut tapiissutit annerpaaffiannik tunineqarnissamut piumasaqaatit attartortitami naammassineqarsimassanngippata ineqarnermut tapiissutit aningaasartai annikinnerusut tunniunneqarsinnaassapput.

Imm. 2-mut

Aalajangersakkap kingunerissavaa imm. 1 naapertorlugu kingullermik naatsorsuisoqarnerata kingorna inoqutigiiit ataatsimut ineqarnermut tamakkiisumik akiliutaanni, inoqutigiiit akileraarutitigut ilanngaait ilanngunnagit massakkut aningaasarsiaanni tamarmiusuni, inissiami taassumalu aaqqissugaanerani imaluunniit meeqqat 18-it inorlugit ukiullit angerlarsimaffimmi najugaqartut amerlassusiini malunnaatilimmik allanngortoqarsimappat naatsorsueqqittoqartussaana.

Imm. 3-mut

Aalajangersakkami erseqqissarneqarpoq meeqqat 18-it inorlugit ukiullit angerlarsimaffimmi najugaqartut amerlassusaannut allannguutit kommunitumut nalunaaruteqarnerup kingorna qaammatip tulliuttup aallaqqaataanit ilanngunneqartassasut. Aalajangersagaq imatut paasineqassaaq kommuni inuttaasumit nalunaarfigineqarsinnaasoq, soorluttaarlu kommuni nammineerluni iserfigisinnaasaminut pisinnaatitaaffimmilu iluani CPR-inut nalunaarsuiffimmiit imaluunniit nalunaarsuiffinniit allanit tigooraasinnaasoq.

Ineqarnermut tapiissutit naatsorsorneqarneranni inoqutigiiit meerartaat 18-it inorlugit ukiullit eqqarsaatigineqassapput. Naatsorsuutigineqarpoq ineqarnermut tapiissutit ingerlaannartumik naatsorsorneqartassasut, tassa inoqutigiinni meeqqap ataatsip 18-inik ukioqalernerata kingorna qaammatip tulliuttup aallaqqaataanit tapiissutit appartussanngorlugit.

§ 6-imut

Imm. 1-imut

Aalajangersagaq ineqarnermut tapiissutinik qinnuteqartoqarnerani atorineqartarpoq.

Siunnersuutip kingunerissavaa ineqarnermut tapiissutinik qinnuteqartut pissutsit pillugit kommunitumut iluoorlutik nalunaartussaataalissammata, tamatumani inuup ineqarnermut tapiissutinik tunineqarnissaanut pingaarutilinnik allanngortoqarsimappat, tamatumanilu inoqutigiiit amerlassusii, katitigaaneri aningaasarsiaallu kiisalu inissiaq taassumalu aaqqissugaanera pillugit paasissutissat pineqarput. Paasissutissiisussaataaneq ineqarnermut tapiissutinik kommunalbestyrelsip naatsorsuinissaanut pissutsinut pingaaruteqarsinnaasunut aamma atuuppoq.

Imm. 2-mut

Aalajangersagaq innuttaasoq ineqarnermut tapiissutinik siusinnerusukkat tunineqarsimappat atorineqartussaavoq.

Ineqarnermut tapiissutininik tunineqartoq ineqarnermut tapiissutininik tunniussisoqarnissaani, kommunillu ineqarnermut tapiissutininik naatsorsuinissaani pingaaruteqarsinnaasunik malunnartumik allannguutininik nalunaassalluni pisussaaffeqarpoq.

Imm. 3-mut

Qinnuteqartup imaluunniit ineqarnermut tapiissutininik pisartagaqartup imm. 1-2-mi paasissutissat eqqaaneqartut tunniutinngippagit paasissutissat pisariaqartut pillugit kommunalbestyrelsi eqqoriaalluni aalajangiisinnaasoq, aalajangersakkami allaqqavoq.

§ 7-imut

Aalajangersagaq nutaajuvoq, tassanilu aalajangersarneqarpoq inunnut ineqarnermut tapiissutininik tuneqqusaanngitsunut ineqarnermut tapiissutininik tunniussisoqannginnissaanik kommunalbestyrelsip ingerlaavartumik nakkutiginnittussaanera pisussaaffigineqartoq. Tamatumani aamma pineqarpoq aningaasat tunniunneqartut innuttaasup pisinnaasaanut naapertuuttuunersut.

Aalajangersakkatigut erseqqissarneqarpoq ineqarnermut tapiissutininik tunniussisoqarnerani kommunalbestyrelsi ingerlaavartumik misissuisassalluni pisussaaffeqartoq, tassungalu ilaalluni aningaasat annertussusiinut tunniunneqarnerannullu paasissutissat nutaat nalorninartoqarsinnaanerannut isummersinnaaneq. Ingerlaavartumik nakkutiginninnerit imaluunniit allanik paasissutissiinerit tunngavigalugit ineqarnermut tapiissutit tunngaviliunneqartut malinnagit tunniunneqarnerannut kommunalbestyrelsi pasitsaassaqaassagaluarpas ineqarnermut tapiissutit tunniunneqarnissaat allanngortinneqarnissaalluunniit pillugit misissuinissaq siunertaralugu kommuni aaqqiissutissanik aallartitsissaaq.

§ 8-mut

Imm. 1-imut

Aalajangersagaq allanngortinneqarpoq, tassami aningaasarsiat § 5 malillugu naatsorsorneqarnissaat aallaavigineqarmat.

Imm. 2-mut

Aalajangersakkatigut Naalakkersuisut piginnaatinneqarput nalunaarummi ukiumoortumik ineqarnermut tapiissutit pillugit aningaasanut killiliissutit, nammineq akiliutissat aamma aningaasat minnerpaaffissaat annerpaaffissaallu pillugit maleruaqqusanik aalajangersaanissamat.

Inatsimmi § 5-imut innersuullugu meeqqat 18-it inorlugit ukiullit angerlarsimasut, inissiaq taassumalu aaqqiissuunera, attartornermut akiliut inoqtugiillu massakkut katillugit isertitaat

akileraaruteqarfiusut ilanngaasernagit aallaavigalugit Naalakkersuisut ineqarnermut tapiutit annertussusilertassavaat.

Qinnuteqartoq meeraqarnermaq imaluunniit meeraqannginnersoq apeqqutaalluni ineqarnermut tapiissutinik qinnuteqartup isertitaasa annertussusaa qanoq annertugissanersoq Naalakkersuisut killilersinnaavaat. Taassuma saniatigut ineqarnermut tapiissutinik pisartagallip nammineq akiliutissaanut sukumiinerusumik Naalakkersuisut inatsisinik aalajangersaasinnaapput.

Inissiap taassumalu aaqqissugaaneranut tunngavigineqartussat atuutsinneqalerneratigut ineqarnermut tapiissutit tamakkiisumik pisarnissaannut inissiamut piumasaqaatit suut eqquutsinneqassanersut Naalakkersuisut nalunaarutinngorlugu aalajangersaasinnaapput. Taassuma ataani attartukkap aaqqissuunneranut piumasaqaatinik aalajangersaasoqarsinnaavoq, soorlu anartarfilersuinernut, attartugaq kuuginnartumik imeqarnermaq il.il., taavalu immikkut isaariaqarnermaq.

§ 9-mut

Imm. 1-imut

Aalajangersakkatigut oqaatigineqarpoq inissianut attartortakkanut ineqarnermut tapiissutit ukuiup naatsorsuuteqarfiusup naanerani iluarsiiiffigineqartassasut. Tamatuma saniatigut aalajangersakkatigut qularnaarneqarpoq ineqarnermut tapiissutit § 5 naapertorlugu iluarsiiiffigineqarsinnaanerat.

Imm. 2-mut

Aalajangersakkatigut erseqqissarneqarpoq inissiani attartortittakkani ineqarnermut tapiissutit iluarsiiiffigineqartarnerat, inissianut immikkoortortaqrifiit atorineqartut ataasiakkaat ukioq naatsorsuuteqarfiat malillugu tapiissutit ukuiat malillugit pisassaaq.

Taamaasilluni inissianut immikkoortortaqrifiit ataasiakkaat ukiumut naatsorsuutit tunniunnissaannut piffissaq namminneq aalajangernissaannut periarfissaat qulakkeerneqassaaq.

Imm. 3-mut

Inissiaq attartugaq inissianut immikkoortortamut attuumassuteqanngippat ukuiup ineqarnermut tapiissuteqarfiusup ukioq qaammatisiuteqarfiusoq malissavaa.

§ 10-imut

Matumani maleruaqqusat atuuttut allanngortinnerat pineqarpoq, tassami siunissami inatsisini allanneqartuni qinnuteqaammut uppernarsaatissat pisariaqartinneqartut ilanngunneqartarnissaat pillugit piumasaqartoqartalissammat.

Aalajangersakkatigut erseqqissarneqarpoq ineqarnermut tapiissutininik qinnuteqaat kommunalbestyrelsimut tunniunneqartassasoq.

Taakku saniasigut piumasarineqassaaq ineqarnermut tapiissutinut qinnuteqartoqarnerani uppersaatissat pisariaqartinneqartut ilanngunneqartassasut. Tassani ilaatigut ilanngunneqartartussaassapput attartornermut isumaqatigiissut, aningaasarsiatigut paasissutissat, ilaqutariit katitigaanerat, inissiaq taassumalu aqqissugaanera pillugit paasissutissat il.il.

§ 11-mut

Imm. 1-imut

Aalajangersakkatigut erseqqissarneqarpoq kommunalbestyrelsi tassaasoq ineqarnermut tapiissutit pillugit aalajangiisussaq.

Ineqarnermut tapiissutit pillugit aalajangiineq § 5 malillugu paasissutissat aallaavigalugit pissaaq.

Imm. 2-mut

Aalajangersakkatigut erseqqissarneqarpoq, inissiani attartortittakkani ineqarnermut tapiissutit ukiumoortumik aningaasanut aalajangersimasunut naatsorsorneqassasut, taakku tolvtedeliat attartortup ineqarnerminut akiliuteqarnissaa sioqqullugu qaammatikkaartumik ilanngaatigineqartassapput. Taamaalilluni ineqarnermut tapiissutit ineqarnermullu akiliutit nikingassutaat kisimi akiliutigineqartassaaq.

Imm. 3-mut

Ineqarnermut tapiissutit attartortumut ingerlaannartumik tunniunneqassapput.

§ 12-imut

Matumani maleruaqqusat maannamut atuuttut allanngortinneri pineqarput.

Imm. 1-imut

Aalajangersakkatigut ineqarnermut tapiissutit qinnuteqareernerup kingornagut, piumasaqaatillu naammassineqareerpata qaammatip aallaqqaataani atuutilersumik tunniunneqartarnerat erseqqissarneqarpoq. Qaammatip aallaqqaataaniunngitsoq ulloq alla inissiamut nuunnermi qaammatip tulliuuttup aallaqqaataanit ineqarnermut tapiissutit tunniunneqassapput.

Imm. 2-mut

Aalajangersakkatigut erseqqissarneqarpoq ineqarnermut tapiissutit qaammatikkaartumik siumut tunniunneqartartut.

§ 13-imut

Matumani maleruaqqusat maannamut atuuttut allannortinneri pineqarput.

Imm. 1-imut

Aalajangersakkatigut erseqqissarneqarpoq ingerlaavartumik imaluunniit siusinnerusukkut nalunaartussaataaneq eqqortinneqarsimassanngippat ineqarnermut tapiissutinut annertuallaartumik tunniussisimanerit utertinneqarnissaat pillugit kommunalbestyrelsi aalajangiisinnaasoq.

Imm. 2-mut

Aalajangersakkatigut erseqqissarneqarpoq utertitsisoqarnissaanik piumasaqarneq pisortanut pillugit akiliisitsiniartarnermut inatsisit qaqugukkulluunniit atuuttut malillugit pisartussaammat.

§ 14-imut

Aalajangersagaq maleruaqqusanik ulloq manna tikillugu atuuttunik allannuineruvoq.

Imm. 1-imut

Ineqarnermut tapiissutinik tunineqarnissamut piumasaqaatit naammassineqarsinnaajunnaarsimappata ineqarnermut tapiissutit qanoq ilinerani atorunnaartussaanerit aalajangersakkakut aalajangersarneqarpoq.

Imm. 2-mut

Nuuttoqartillugu ineqarnermut tapiissutit tunniunneqartut atorunnaassapput.

Inissiamut allamut nuunnermi ineqarnermut tapiissutit pillugit qinnuteqaat nutaaq tunniunneqassaaq.

§ 15-imut

Matumani maannamut maleruaqqusat atuuttut ingerlateqqinneqarnissaat pineqarpoq.

Imm. 1-imut

Aalajangersakkakut aalajangersarneqarpoq inissiani attartortittakkani ineqarnermut tapiissutinut aningaasartuutit avillugit Nunatta Karsianit 60 pct.-it kommunimillu 40 pct.-it akilerneqartarnissaat.

Imm. 2-mut

Aalajangersakkatigut Naalackersuisut piginnaatinneqarput naatsorsuutininik saqummiussisarnissaq kukkunersuisarnissarlu pillugit maleruaqqusanik

aalajangersaanissamut. Aalajangersagaq taanna ilanngunneqarpoq ineqarnermut tapiissutinut aningaasartuutit annersaannik Nunatta Karsia akiliisarmat.

§ 16-imut

Matumani maannamut maleruaqqusat atuuttut ingerlateqqinneqarnissaat pineqarpoq.

Aalajangersakkatigut erseqqissarneqarpoq inatsit taanna malillugu aalajangiinerit tamarmik Isumaginnittoqarfiup aqunneqarnera aqqissuussaanageralu pillugit inatsisiliornermi maleruaqqusat malillugit Isumaginninnermi Naammagittaalliuuteqartarfimmuut naammagittaalliuutigineqarsinnaasut.

§ 17-imut

Matumani maleruaqqusat maannamut atuuttut allanngortinnerat pineqarpoq.

Imm. 1-imut

Aalajangersakkatigut erseqqissarneqarpoq inatsit ulloq 1. januar 2016 atuutilissasoq.

Taamaalilluni 1. januar 2016-ip kingorna ineqarnermut tapiissutinik naatsorsuinerit tamarmik inatsimmi tassani maleruaqqusat malillugit pisassapput.

Imm. 2-mut

Aalajangersagaq nutaajuvoq, tassanilu aalajangersarneqarpoq inatsisip atuutilerana sioqqullugu ineqarnermut tapiissutit naatsorsorneqareersut ingerlaannassasut, tamatumani sioqqullugu ineqarnermut tapiissutit naatsorsorneqareersut ingerlaannassasut, tamatumani piffissaq naatsorsuiffiusoq naareersimassasoq imaluunniit inoqutigiinni pissutsit allanngoreersimasut il.il. pissutigalugit naatsorsueqqinnissaq pisariaqalersimappat, tak. inatsisissatut siunnersuummi § 5.

Imm. 3-mut

Aalajangersakkatigut erseqqissarneqarpoq Inissiani attartortittakkani ineqarnermut tapiissutit pillugit Inatsisartut peqqussutaat nr. 3, 31. maj 2001-imeersoq, Inissiani attartortittakkani ineqarnermut tapiissutit pillugit Inatsisartut peqqussutaata allanngortinneqarneranik Inatsisartut peqqussutaat nr. 13, 12. november 2001-imeersoq, Inissiani attartortittakkani ineqarnermut tapiissutit pillugit inatsisartut peqqussutaata allanngortinneqarnera pillugu Inatsisartut peqqussutaat nr. 13, 14. november 2004-meersoq aamma Inissiani attartortittakkani ineqarnermut akiliummut tapiissutit pillugit Inatsisartut peqqussutaata allanngortinnissaa pillugu Inatsisartut peqqussutaat nr. 6, 7. maj 2007-imeersoq inatsisartut inatsisaata atuutilerenerani atorunnaassasut.

Imm. 4-mut

Aalangersakkap kingunerissavaa aningaasanut killiliissutit il. il. pillugit nalunaarut maanna
atuuttoq nalunaarummik nutaamik taarserneqarnissaata tungaanut atuutissammat.